



COMUN DI UDIN
Servizi Culture e Istruzion

INFORMATIVE PAI CENTRIS RICREATÎFS ESTÎFS DAL AN 2026



A) MODALITÂT DI ISCRIZION

Il Centri Ricreatîf Estîf al è un servizi educatîf e ricreatîf di interès public che al permet ai fruts, aes frutis, ai fantats e aes fantatis di passâ un Istât caraterizât de educazion e dal divertiment. La sô finalitât e je chê di permetiur di passâ il timp libar in maniere costrutive, creant leams e vivint esperiencis significativis cun personis de lôr etât. L'obietîf dai CRE al è chel di garantî il benstâ e il divertiment di ducj chei che a partecipin midiant di un program siôr che al cjape dentri ativitâts creativis e sportivis, zûcs tal viert, moments di leture e laboratoris espressîfs, intun ambient che al sedi curât e di stimul.

Il centri ricreatîf estîf al à ancje une funzion sociâl parcè che vie pal Istât, cuant che lis scuêlis a son sieradis, al jude lis fameis a conciliâ il rapuart tra famee e lavôr.

1. Prenotazions

Lis prenotazioni pai Centris Ricreatîfs Estîfs (CRE) si presentin

di joibe ai 12 di Fevrâr a joibe ai 12 di Març dal 2026, dentri des 12.00

dome **online** cul sisteme E-Civis, jentrant tal sît <https://udine.ecivis.it/> e fasint clic sul boton **Accedi all'area personale**. Par jentrâ tal portâl E-Civis bisugne vê il SPID (Sisteme Public di Identitât Digjitâl) o la CIE (Cjarte di Identitât Eletroniche)*.

Par rivâ te sezion dai modui online, si à di lâ daûr di chest percors: **Accedi → Moduli online → Compila → Centri Ricreativi Estivi**.

Al è impuartant visâsi che si varà di jemplâ une domande par ogni minôr che si vûl zontâ.

Par fâ la prenotazione in maniere plui facile e svelte, al è miôr vê za cun se chestis informazions:

- codiç fiscâl dal titulâr de responsabilitât gjenitoriâl/tutôr
- codiç fiscâl dal minôr
- credenziâls SPID o CIE
- ISEE 2026
- direzion di pueste eletroniche che e corispuindarà al recapit dulà che a vignaran mandadis DUTIS lis comunicazions leadis al servizi
- riferiments telefonics
- dâts dai delegâts che a puedin lâ a cjoli il minôr (cognon, non, date di nassite, celulâr, e v.i.).

Par vê assistance te compilazion on line de domande, par fissâ un apontament pe compilazion assistude o par domandâ sclariments viodi la ultime pagine cui riferiments sui contats.

La domande di prenotazione al servizi **no vignarà acetade** se a risultin faturis leadis ae frecuece dai CRE tai agns prin che no sedin stadis paiadis di cui che al fâs la domande o dal gjenitôr/tutôr coobleât o di un altri sogjet intestatari de fature o des faturis pal servizi.

*Par vê plui informazions sul SPID e su cemût otignîlu, consultâ il sît www.spid.gov.it.

Par savê cemût che si ative la CIE, consultâ il sît <https://www.cartaidentita.interno.gov.it/attiva/>

NOTE IMPUARTANTE

Il sistema di E-Civis al à dentri i dâts dal sogjet, denominât **"Tutôr"**, che tal 2025 o intai agns prin al à mandât la domande pe iscrizion al servizi CRE.

Si sugjeris che cui che al presente la domande pal an 2026 al sedi il sogjet registrât come **"Tutôr"**.

Il sogjet registrât come **"Tutôr"** tal sistema di E-Civis al è l'intestatari dal avîs di paiament e de fature relative.

Se par câs **si ves bisugne di modificâ il "Tutôr"** **PRIME DI INVIÂ LA DOMANDE DI PRENOTAZION si varan di contatâ subit i uficis (viodi la ultime pagine cui riferiments sui contats)**

Cun di plui, PRIN DI INVIÂ LA DOMANDE DI PRENOTAZION, il tutôr al pues jentrâ te plateforme E-Civis e modificâ ducj i siei dâts fûr che il non, il cognon e codiç fiscâl corezi e/o modificâ la direzion di pueste eletroniche e/o il numar di telefon e altri. Il modul par modificâ il "Tutôr" al sarâ publicât tal sistema E-Civis e tal sît dal Comun di Udin te pagine dedicate ai CRE.

Si racomande di inviâ lis domandis di modifiche dal "Tutôr" dentri dai 10 di Març dal 2026 par podê inzornâ il sistema.

Dopo che si à trasmetude la domande di prenotazione, i dâts metûts dentri no si podaran plui modificâ.

2. Acès al servizi

Par fâ in mût che un numar plui alt di fameis al vedi acès al servizi, si pues prenotâsi a **massime trê turnis** par ogni minôr.

3. Spedizion des domandis

Al è une vore impuartant jemplâ la domande cun atenzion, parcè che dopo che e je stade inviate e ven protocolade in automatic e **no** si podarà plui ni modificâle, ni cancelâle, ni tornâ a presentâle di bessôi.

Par modificâ o cancelâ la domande inviate, il "Tutôr" al à di scrivi a progettieducativi@comune.udine.it e domandâ che e sedi cancelade. Stant che nol è pussibil modificâle in maniere direte, la domande e à di jessi cancelade e tornade a presentâ. Te domande di cancelazion bisugne ripuartâ il numar identificatîf de domande assegnât dal sistema E-Civis e meti in zonte un document di identitât dal "Tutôr".

Lis domandis di cancelazion a àn di rivâ ae direzion di pueste eletroniche dite sore dentri dai 10 di Març dal 2026.

Une volte sieradis lis prenotazioni (aes 12.00 dai 12 di Març dal 2026) no si podaran plui modificâ i dâts segnâts te domande (cjapant dentri ancje turnis, oraris, ples e v.i.)

4. Criteris pe elaborazion des graduatoriis

Lis graduatoriis si elaborin daûr di criteris di prioritât fissâts dal Regolament pe frecuece dai CRE, che al ten cont des modificazions specificadis te Deliberazion dal Consei Comunâl n. 11 dai 28/03/2022:

- residence tal Comun di Udin dal minôr o di almancul un dai titulârs de responsabilitât gjenitoriâl
- minôr che al à l'aciertament de disabilitât daûr de L. 104/92 tal moment che si presente la domande (cul limit massim dal 10% dai puecj a disposizion par ogni turni di frecuece in ogni CRE)
- minôr cun ducj i doi i titulârs de responsabilitât gjenitoriâl, ancje se no son convivents, lavoradôrs, o, tal câs di nucli monoparentâl, minôrs cun titulâr de responsabilitât gjenitoriâl lavoradôr
- minôr cun altris minôrs convivents iscrits a CRE inmaneâts dal Comun di Udin
- cundizions economichis des fameis misuradis midiant dal indicadôr de situazion economiche ecuivalente (ISEE): a àn prioritât lis fameis cul ISEE plui bas

Lis cundizions ditis sore a àn di existi tal moment che si fâs la prenotazion online e duncje a àn di jessi declaradis cuant che si jemple la domande di prenotazion.

Pe redazion des graduatoriis a saran tignûts in considerazion i parametris elencâts parsore, doprant il valôr ISEE presint tal portâl INPS te date che si sierin lis prenotazions.

Lis domandis dai no residents si acetin dome par finî i puescj che a son restâts disponibii, doprant i stes criteris dits sore.

5. Graduatoriis

No son previodudis graduatoriis provisorii. Lis graduatoriis definitivis a vignaran publicadis tor i prins di Avrîl e si podaran consultâ tal sît dal Comun di Udin (www.comune.udine.it). Lis graduatoriis si puedin consultâ par sede e par turni.

Par consultâ lis graduatoriis si à di vê il numar de domande di iscrizion furnît dal sisteme E-Civis.

6. Listis di spiete

Par ogni CRE e vignarà fate une liste di spiete par jemplâ puescj disponibii, se a 'nd è, tal câs di rinunziis o di mancjade ocupazion totâl o parziâl dai puescj risiervâts.

7. Paiments

A chei che, su la fonde dai criteris elencâts parsore, a jentraran te graduatorie, ur sarà inviât un avîs di paiament PagoPA, intestât al gjenitôr/tutôr, dome ae direzion di pueste eletroniche dade jù in fase di iscrizion. Par evitâ impediments te ricezion des e-mail, si consee, cuant che a saran publicadis, di tirâ fûr l'avîs di paiament PagoPA jentrant te aree personâl dal sisteme E-Civis o se no, in alternative, tal sît di Efil midiant des credenziâls Spid.

SI RACOMANDE DI CONTROLÂ CHE LA MAIL E SEDI RIVADE ANCJE TE CARTELE DAL SPAM.

Par perfezionâ la iscrizion al centri ricreatîf estîf, il paiament al à di jessi fat dentri de date segnade tal avîs PagoPA; dopo di chê date la prenotazion e vignarà anulade in automatic cence altris comunicazions e duncje no si furnirà nissune prestazion al utent, cu la consequence de risolucion di cualsei rapuart contratuâl daûr dal art. 26 dal DPR 633/1972.

La fature e sarà mandade in automatic a ducj i utents che a son jentrâts te graduatorie. Pai turnis no confermâts cul paiament dal avîs PagoPA si emetarà une note di credit.

Si ricuarde, infin, di conservâ la fature e la ricevude di paiament, furnide dal sisteme PagoPA, pal ricognossiment di eventuâi contribûts/agievolazions (par es. la "Dote Famiglia").

Si domande di no fâ paiments dopo de date segnade tal avîs PagoPA.

La prenotazion e sarà in ogni câs anulade e lis sumis paiadis a saran rimborsadis daûr dai tims dal pont E) co. 4 plui indenant in cheste informative. 4.

Lis faturis cun cuietance si podarà cjatâlis jentrant tal scancel fiscâl personâl de Agenzie des Jentradis.

7.1 Trop costial iscrivi i/lis minôrs ai CRE?

Par vê un jutori tal planificâ lis spesis, al è a disposizion un simuladôr di calcul in linie te pagine dedicate ai Centris Ricreatîfs Estîfs. Metint dentri i dâts necessariis o podarês otignî une stime imediade dai coscj.

Atenzion: L'impuart che si oten al è dome indicatîf; la cifre definitive e sarà chê ripuartade tal avîs di paiament PagoPA.

Par vê plui informazions su lis tarîfis viodi la sezion E) Tarîfis, Cundizions Particolârs e Rimbors

Considerâ ancje che si varà di paiâ la cuote par intîr dentri de date indicade tal avîs PagoPA.

B) FASSIS DI ETÂT, SEDIS e TURNIS, ORARIS DI FUNZIONAMENT

1. Fassis di etât, sedis

Lis sedis scolastichis no àn l'implant di condizionament.

a. CRE 3-6 AGNS (Giocaestate)

Par minôrs **nassûts dopo dal 01/01/2020 e che a àn finît trê agns** cuant che a frequentin. Si fasin in chestis sedis di scuele de infanzie:

- scuele "I di Mai" - Vie Martignà n. 60
- scuele "Maria Forte" - Vie R. di Giusto n. 84
- scuele "Via Baldasseria Media" - Vie Baldassarie Medie n. 23
- scuele "Zambelli" * - Vie Bernardinis n. 105

***ATTENZION:** Tignint cont che la domande di prenotazion pal CRE Zambelli tal prin (dai 29 di Jugn ai 10 di Lui) e tal secont turni (dai 13 ai 24 di Lui) e je simpri une vore alte, e par rispuindi te miôr maniere pussibile ae necessitâts des fameis:

- ai prins 40 utents in graduatorie ur sarà assegnade la sede "Zambelli"
- ai 40 utents dopo (ven a stâi dal numar 41 al numar 80) ur sarà assegnade di ufici la sede "Marco Volpe" di vie Marco Volpe n. 30.

Si precise che **la sede assegnade e je definitive**: par chest nol è pussibil domandâ di cambiâle, ni rinunziâ ae sede "Marco Volpe" par spietâ di jentrâ te sede "Zambelli". La prenotazion di cui che al rinunzie a une des dôs sedis e sarà anulade in automatic.

b. CRE 6-11 AGNS (Giocaestate)

Par minôrs **nassûts dal 01/01/2015 ai 31/12/2020**. Si fasin in chestis sedis di scuele primarie:

- scuele "Nievo"* - Vie Gurize n. 19
- scuele "Divisione Alpina Julia" - Place Polonia n. 1
- scuele "Alberti" - Vie Baldassarie Medie n. 25
- scuele "Pellico" - Vie San Pieri n. 70
- scuele "Girardini" - Vie Judri n. 1/A

***ATTENZION:** Tignint cont che la domande di prenotazion pal CRE Nievo tal prin (dai 29 di Jugn ai 10 di Lui) e tal secont turni (dai 13 ai 24 di Lui) e je simpri une vore alte, e par rispuindi te miôr maniere pussibile ae necessitâts des fameis:

- ai prins 75 utents in graduatorie ur sarà assegnade la sede "Nievo".
- ai 45 utents dopo (ven a stâi dal numar 76 al numar 120) ur sarà assegnade di ufici la sede "Zorutti" di vie XXX di Otubar n. 17.

Si precise che **la sede assegnade e je definitiva**: par chest nol è pussibil domandâ di cambiâle, ni rinunziâ ae sede "Zorutti" par spietâ di jentrâ te sede "Nievo". La prenotazion di cui che al rinunzie a une des dôs sedis e sarà anulade in automatic.

c. CRE 11-14 AGNS (Summer Play Camp)

Par minôrs **nassûts dal 01/01/2012 ai 31/12/2015**. Si fasin in cheste sede di scuele secondarie di 1ⁿ grât:

- scuele "Ellero" - Vie Divisione Julia n. 1

2. Turnis

I CRE 3-6, 6-11 e 11-14 agns a saran ativâts cun turnis di dôs setemanis (10 dîs lavoratîfs, dal lunis al vinars):

a. I turnis dai CRE 3-6 e 6-11 agns a son:

- Pre turni: dai 15 di Jugn ai 26 di Jugn (CRE 6-11: pes scuelis “Nievo”, “Divisione Alpina Julia” e “Zardini”)
- 1ⁿ turni: dai 29 di Jugn ai 10 di Lui
- 2^t turni: dai 13 di Lui ai 24 di Lui
- 3^e turni: dai 27 di Lui ai 7 di Avost
- 4^t turni: dai 10 di Avost ai 21 di Avost

b. I turnis dai CRE 11-14 agns a son:

- 1ⁿ turni: dai 29 di Jugn ai 10 di Lui
- 2^t turni: dai 13 di Lui ai 24 di Lui
- 3^e turni: dai 27 di Lui ai 7 di Avost

3. Oraris di funzionament

Ducj i CRE a àn chescj oraris:

- jentrade des 7.45 aes 9.00
- prime jessude des 13.00 aes 13.15 (cun ancje il gustâ)
- seconde jessude des 15.30 aes 16.15.

Il gjenitôr/tutôr al è tignût a rispietâ la puntualitât tai oraris di consegne e ritîr dai minôrs.

In câs di impegnis ecezionai (par esempiis visitis medichis), al sarâ permetût jentrâ o jessî fûr des fassis orariis stabilidis. Al è necessari che il titulâr de responsabilitât gjenitoriâl ad dedi un preavîs adeguât in forme scrite e firmât, di presentâ al coordinadôr dal centri e di inviâ a progettieducativi@comune.udine.it.

C) ATIVITÂTS DAL CENTRI ESTÎF

1. Programazion

In maniere indicative, la programazion de zornade e je cheste:

CRE 3-6 AGNS	CRE 6-11 AGNS	CRE 11-14 AGNS
7:45 - 9:00 Acet. Ativitâts di svicinament e introduzion ae storie contade. Ativitâts di animazion cun zûcs e bai animâts	7:45 - 9:00 Acet. Ativitâts di ativazion e zûcs di moviment	7:45 - 9:00 Acet. Zûcs motoris didentri. Zûcs di taule
9:00 - 9:30 Mirinde e azions cuotidianis di cure/igiene	9:00 - 10:30 Zûcs di grup	9:00 - 10:30 Laboratoris
9:30 - 11:00 Ativitâts teatrâls, creativis e sensoriâls	10:30 - 11:00 Mirinde e zûc libar	10:30 - 11:00 Mirinde
11:00 - 12:00 Ativitâts di moviment e/o di zûc	11:00 - 11:30 Ativitâts di moviment e sportivis	11:00 - 12:00 Ativitâts sportivis
12:00 - 13:15 Preparazion al gustâ e gustâ	11:30 - 12:30 Ativitâts a scuadris: cjaçe al tesaur, orientament, zûcs	12:00 - 13:15 Gustâ
13.15-14:00 Moment di zûc libar e polse	12.30-13.15 Gustâ	13:15 - 14:00 Zûc libar, polse, compits
14:00 - 15:15 Zûcs, leturis,	13:15 - 15:00 Laboratoris creatîfs, ativitâts espressivis,	14:00 - 15:15 Zûcs di rûl, zûcs

laboratoris, ativitâts espressivis	zûcs musicâi	di taule, ativitâts ludichis
15:15 - 15:30 Mirinde	15:00 - 15:30 Mirinde e zûc libar	15:15 - 15:30 Mirinde
15:30 - 16:15 Seconde jessude	15:30 - 16:15 Seconde jessude	15:30 - 16:15 Seconde jessude

2. Ce che si à di puartâ tal Centri Ricreatîf Estîf

- Buracje personalizade
- Cjapielut
- Un sacut contrassegnât cun dentri lis scarpis di gjinastiche di doprâ te palestre pai CRE 6-11 e 11-14 agns
- Un sacut contrassegnât cun dentri un cambi complet di vistîts pai CRE 3-6 agns

Si consee di mandâ i fruts cun vistîts e scarpis comuts.

3. Gjitis/Escursions tal teritori

Il centri ricreatîf estîf al previôt escursions tal teritori e pai CRE 6-11 e 11-14 agns une gjite par ogni turni.

I minôrs a àn di jessi in stât di partecipâ in maniere autonome a dutis lis gjitis/escursions tal teritori cence meti in pericol la sigurece e la incolumitât lôr e di chei altris.

Intes zornadis des gjitis/escursions no son previodudis ativitâts alternativis, duncje il minôr che nol è autorizât a partecipâ aes gjitis nol podarà frecuentâ il centri ricreatîf estîf in chês zornadis.

D) SUPUART AI MINÔRS IN CUNDIZIONS DI DISVANTAÇ

Tal moment de iscrizion in linie al servizi di centri ricreatîf estîf, il gjenitôr/tutôr al è tignût a indicâ il minôr di etât cun disabilitât o in cundizion di svantaç, compilant la schede informative obligatorie che si cjate in zonte ae domande di prenotazione, tignint simpri presint che il minôr di etât al à di jessi in grât di partecipâ aes ativitâts dal grup dulà che al è inserît e no vê bisugne di un spazi separât e di un educadôr individuâl. Lis informazions inte schede informative a coventin par capî miôr lis dibisugnis dal frut o de frute e concuardâ, tal câs che al/e jentri te graduatorie, lis modalitâts plui adatis par frecuentâ il servizi.

L'ufici si risierv di contatâ il gjenitôr/tutôr dai arlêfs che par chei il servizi nol à dâts e, se al covente, ancje di chei che al cognòs za, par vê plui informazions su lis dibisugnis comunicadis. Il pussibil contat al à dome un fin informatîf e nol rapresente in nissun câs une conferme dal fat che il minôr al sedi stât acetât tal centri ricreatîf estîf. La informazion su la eventûâl acetazion tal centri ricreatîf estîf e vignarà fûr **dome** des graduatoriis che a son stadis fatis buinis.

Su la fonde des indicazioni vudis, si fasarà une valutazion comune cu la dite apaltadore dal servizi di CRE e, se dal câs, cui Servizis Sociâi. Te valutazion si tignarà cont des dibisugnis dal minôr, de adeguatece dal servizi di CRE in relazion aes sôs dibisugnis e carateristichis, dal orari di permanence tal centri, de pussibilitât o no di partecipâ aes gjitis e aes escursions tal teritori.

Si specifiche che NOL è previodût il rapuart 1:1 educadôr/minôr. Par ogni CRE e par ogni turni e je previodude la presince di un animadôr di riferiment socioeducatîf che al jude i animadôrs dal CRE stant daûr a ducj i minôrs in cundizions di disvantaç iscrits in chel turni e in chel centri.

Par partecipâ al servizi di centri ricreatîf estîf si à di vê une capacitât minime di interagjî tes ativitâts di grup, di zûc e di socializazion, di là di jessi autonomis tal ambit de igiene personâl, de alimentazion e dal control sfinteric. Cun di plui, si à di vê une minime capacitât di control des emozions, daûr de etât (gjestî la frustrazion, la rabie, e v.i.).

Par chest si invidin i gjenitôrs/tutôrs a stazâ lis capacitâts dal minôr di savê frontâ l'impegn dal CRE, indicant, in câs, un timp di frecuece curt.

Si specifiche che il servizi di centri ricreatîf estîf nol à une funzion socioassistenziâl e che no son presints operadôrs socioassistenziâls. La partecipazion di minôrs che a àn bisugne di un rapuart educadôr/minôr di 1:1 tal centri estîf e je subordenade a chestis cundizions:

1. la pussibilitât di assegnâ al minôr un operadôr/educadôr cun competencis specifichis pe assistence individuâl metût a disposizion dai Servizis Sociâi dai Comuns dal Ambit “Friûl Centrâl”
2. tai oraris e tai turnis no cuvierts dal operadôr/educadôr (viodi il pont 1), la famee e varà di meti dongje dal minôr di etât un so operadôr di fiducie, par garantî la permanence tal CRE pal timp segnât in fase di iscrizion.

La assegnazion e la presince di figuris professionâls cun competencis specifichis pe assistence individuâl e je une cundizion indispensabile pal acet dai minôrs in situazions particolârs di svantaç in maniere di garantîur lis cundizions di servizi plui adeguadis.

D1) SERVIZI SPERIMENTÂL “STELIS IN ZÛC”

Il servizi sperimentâl denominât "Stelis in Zûc" al è un percors di animazion inclusîf inmaneât tal contest dal centri ricreatîf estîf "Divisione Alpina Julia", indreçât ai minôrs cun bisugnis educativis speciâls de fasce di etât 6-11 agns.

Chest servizi al nas cul obietîf di ufrî une experience estive di cualitât, che e rivi a meti adun inclusion, benstê e personalizazion educative, in sinergie strete cu lis progetualitâts de strutture che i da acet.

Si proponaran svariadis tipologiis di ativitâts:

- ativitâts ludichis ricreativis: zûcs motoris, ativitâts creativis par stimolâ il divertiment, il moviment e la espressivitât
- laboratoris: experiencis sensoriâls e manipolativis, ativitâts espressivis
- gjitis educativis e di scuvierte sul teritori, flessibilis te strutture de ativitât, rispietosis de gjestion dal timp e adattabilis aes dibisugnis dai minôrs di etât che a partecipin.

I spazis a saran organizâts in maniere di jessi acessibii, ordenâts e stimolants, par favorî la autonomie e la esplorazion libare in sigurece. A saran strutturâts cjantons tematics e un spazi relax, progetât tant che un spazi confuartant e di decompression.

Il servizi "Stelis in Zûc" a nivel indicatîf al sarà atîf in chescj periodis:

Pre turni: dai 15 di Jugn ai 26 di Jugn

1ⁿ turni: dai 29 di Jugn ai 10 di Lui

2^t turni: dai 13 di Lui ai 24 di Lui

Par favorî une partecipazion il plui pussibil plasevule e inclusive, si consee di valutâ i periodis di frecuence daûr des esigjencis specifichis dal minôr, rispietant i siei tims e ritmis personâi.

Il servizi al è strutturât soredut su lis fassis orariis de buinore, che si son dimostradis adeguadis in maniere particolâr tal garantî il benstê e il coinvolziment dai minôrs, ridusint il pericol di fâur fâ masse fadie.

Fassis orariis:

- jentrade des 8.00 aes 9.00
- jessude des 13.30 aes 14.00 (ancje cul gustâ)

Si podarà dâ acet ai/aes minôrs fin aes 16.00, se la valutazion fate insiemi dai uficis dal Comun e dal afidatari dal Servizi lu permetarà.

E) TARIFIS, CUNDIZIONS PARTICOLÂRS E RIMBORS

Ai participants dal servizi di CRE si ur aplichin lis tarifis individuâls par ogni singul turni fissadis cu la deliberazion de Zonte comunâl n. 592 dai 18/11/2025.

1. Cundizions particolârs pai residents dal Comun di Udin:

- Tarifis calculadis daûr dai scaions ISEE

	Orari 7:45 – 13:15			Orari 7:45 – 16:15		
FASSIS I.S.E.E.	Tarife €	I.V.A. €	Tarife cu la IVA comprendude €	Tarife €	I.V.A €	Tarife cu la IVA comprendude €
- di € 0,00 a € 10.000,00	31,17	6,86	38,03	47,95	10,55	58,50
- di € 10.000,01 a € 18.000,00	62,34	13,71	76,05	95,90	21,10	117,00
- di € 18.000,01 a € 25.000,00	103,90	22,86	126,76	159,84	35,16	195,00
- di € 25.000,01 a € 30.000,00	109,02	23,98	133,00	168,03	36,97	205,00
- plui di € 30.000,00	114,75	25,25	140,00	176,23	38,77	215,00

- Tal câs che fradis e sûrs a sedin iscrits tal stes turni: la tarife dal prin utent si le paie par intîr, lis tarifis dal secont utent e di chei dopo (fradi e o sùr), si pain cuntune riduzion dal 20%.
- Esenzion totâl dal paiament par situazions di dificultât economiche grave, aciertade e declarade dal Servizi Sociâl dal Comun di Udin;

2. Tarifis pai no residents tal Comun di Udin:

Orari 7:45 – 13:15			Orari 7:45 – 16:15		
Tarife €	I.V.A. €	Tarife cu la IVA comprendude €	Tarife €	I.V.A €	Tarife cu la IVA comprendude €
118,28	26,02	144,30	181,97	40,03	222,00

3. Atestazion ISEE

Par podê zovâsi des riduzioni des tarifis si à di **jessi residents tal Comun di Udin** e vê, dentri dal tiermin di presentazion des domandis, la **atestazion ISEE 2026**.

La eventûâl riduzion de tarife e vignarà calculade di ufici su la fonde dal valôr par *Prestazions agevoladis indreçadis a minôrs o a fameis cun minôrs*, in cors di validitât, e registrade tal portâl dal INPS te date che si sierin lis prenotazions.

Pai utents che a àn declarât che A VUELIN ZOVÂSI des riduzioni des tarifis leadis al ISEE e che a àn autorizât la Aministrazion Comunâl a doprâ i dâts ISEE registrâts te base di dâts dal INPS, la Aministrazion, cuant che si siere la fase des prenotazions, e proviodarà a recuperâ in autonomie chel dât dal portâl dal INPS. Il gjenitôr/tutôr **no** varà duncje di comunicâ il valôr te domande.

Ai utents che a àn declarât che NO VUELIN ZOVÂSI des riduzioni des tarifis leadis al ISEE e che no àn autorizât la Aministrazion Comunâl a doprâ i dâts ISEE registrâts te base di dâts dal INPS si ur aplicarà la tarife plene.

4. Rimbors

La rete di frecuece e ven rimborsade:

- al 100% dal impuart paiât dome se la rinunzie e rive al ufici competent dentri dai 31 di Mai dal 2026;
- al massim dal 60% dal impuart viersât, dome tal câs che no si vedi podût zovâsi dal servizi, ven a stâi tal câs che l'utent nol vedi podût frecuentâ il turni sielt par resons gravis, justificadis e documentadis. Il turni si considere no frecuentât tal câs che l'utent al risulti assent in dutis lis zornadis dal periodi dal turni o in dutis mancual che une. La domande di rimbors e à di rivâ ai uficis competents dentri di 15 (cuindis) dîs di cuant che al finîs il turni.

Lis domandis di rimbors, scritis sul modul a pueste, a varan di rivâ al ufici competent dentri des datis e des scjadincis indicadis parsore.

Il modul par fâ la domande di rimbors al vignarà publicât tal sisteme E-Civis e tal sît dal Comun di Udine te pagine dedicate ai CRE.

I rimbors a saran fats tacant cul mês di Setembar dal 2026.

F) SERVIZI DI RISTORAZION

I pascj a saran garantîts dal Servizi di Ristorazion Scolastiche: a vignaran servîts il gustâ e lis mirindis, a mieze matine e tal dopomisdî, daûr dal menû fat bon de Aziende Sanitarie.

Pes escursions programadis i minôrs a mangjaran al sac (il gustâ al vignarà furnît dal servizi di ristorazion comunâl).

Al è improibît inte maniere plui assolude puartâ cualsisei aliment o bevande dentri dal CRE.

Jemplant la sezion intitulade “**Domande diete speciâl**” de domande di prenotazion, il gjenitôr/tutôr al pues comunicâ che il minôr al à la necessitât di osservâ, par motîfs di salût, une diete speciâl o di evitâ determinâts gjenars di aliments par vie di alergiis o di intolerancis alimentârs o al pues domandâ di evitâ la somministrazion di cierts aliments par motîfs religjôs, etics o culturâi.

Tal câs di une diete speciâl par motîfs di salût, il certificât medic pe diete speciâl, **se nol è za stât trasmetût vie pal an scolastic**, al à di rivâ dentri di 15 dîs di cuant che al è tacât il pre turni o il turni dal CRE, dome par email, ae direzion: ristorazione.scuole@comune.udine.it.

Par dutis lis **comunicazions e informazions leadis al servizi di ristorazion** i utents a varan di contatâ l'Ufici Ristorazion Scolastiche a un di chescj recapits:

E-mail: ristorazione.scuole@comune.udine.it

Telefon: 0432 -1272720

Altris informazions sul servizi di ristorazion a son a disposizion in cheste pagine dal sît dal Comun di Udine: <https://www.comune.udine.it/Servizi/Ristorazione-Scolastica>

L'afidatari dal servizi di ristorazion dai CRE 3-6 agns al è la aziende CIRFOOD s.c. che e met a disposizion des fameis il sît “Menû Chiaro” (par vê plui informazions, visitâ <https://www.menuchiario.it/comunediu dine/it/#/HomeMenu>) par informâlis sul menû dal dî e par conseâlis su la alimentazion sane e cussiente.

L'afidatari dal servizi di ristorazion CRE 6-11 e 11-14 agns al è la aziende CAMST che e met a disposizion des fameis il sît e la app (par vê plui informazions <https://menu.ristorazionescolastica.it/signin>) par informâlis sul menû dal dî e par conseâlis su la alimentazion sane e cussiente.

G) PARTECIPAZION AL SERVIZI DAL CENTRI RICREATÎF ESTÎF

1. Dovês de utence

Cui che al partecipe al servizi dal Centri Ricreatîf Estîf, in plui di ce che al è stât elencât parsore, al à di:

- vê vistîts pratics e adats aes ativitâts che si fasin tai Centris Ricreatîfs Estîfs;
- vê un compuartament coret, rispietôs e no violent cu lis robis e cu lis personis.

Il Responsabil dai Servizi competent si riserve la facultât di doprâ proviodiments cuintri de utence (contestazion orâl o scrite, slontanament o suspension, daûr de gravitât dai câs) se e je aciertade la falsietât des declarazions fatis te domande di iscrizion, o se a sucedin fatts o comportaments che a puedin rapresentâ un disturb seri pal funzionament coret dal Centri Ricreatîf Estîf e/o provocâ un dam ae Amministrazion Comunâl.

La Amministrazion Comunâl e decline cualsisei responsabilitât pe sotrazion di vistiarî o di ogjets a dam dai iscrits.

2. Medisinâl salvevite

Pe gjezion dai medisinâi salvevite, si pree di inviâ une comunicazion a progettieducativi@comune.udine.it dentri dai 31 di Mai dal 2026, par ativâ lis proceduris necessariis cu lis ditis che a an in afidament il servizi. Si ricuarde che e covente presentade la certificazion mediche cun atestazion pe somministrazion dai medisinâi tai spazis e tai oraris dal Centri Ricreatîf Estîf e il relatîf plan terapeutico.

H) CONTROI SU LIS DECLARAZIONS

La Amministrazion Comunâl e je tignude a verificâ, ancje a campion, lis declarazions presentadis cuant che si à fate la domande daûr dal DPR 445/2000. Se, su la fonde dai controis fatts, al vigniss fûr che lis declarazions sometudis no fossin veris, ancje par minôrs in condizion di disvantaç, daûr de norme dite sore, a son previodudis lis consecuencis dal DPR 445/2000.

I) DOCUMENTS

Tarifari in vigôr

https://www.comune.udine.it/ocmultibinary/download/9448/117688/12/cbc84fc7d408ae176084b9306c54da7d.pdf/file/AlLC_DGD_592.pdf

Regolament pe frecuece dai centris ricreatîfs estîfs

https://www.comune.udine.it/ocmultibinary/download/3076/49798/5/e6856c06163bdcdb36aa50bb89a9f967.pdf/file/Regolamento_CRE.pdf

Cjarte dai Servizis dai Centris Ricreatîfs Estîfs

<https://www.comune.udine.it/ocmultibinary/download/13229/194981/5/99e030cda22d01e3eebdd2f6f6f40c1f.pdf/file/cartaservizicre.pdf>

Ducj i documents si puedin discjamâ dal sît dal Comun di Udin.

**PAR VÊ PLUI INFORMAZIONI E SCLARIMENTIS
O PAR ASSISTENCE TAL COMPILÂ LA DOMANDE IN LINIE (dome su apontament di martars e di joibe)**

**SERVIZI CULTURE E ISTRUZION
U.O. PROJETS EDUCATÎFS**

Oraris par contatâ i uficis: dal lunis al vinars, des 8.30 aes 12.30

Telefon: (0432) 1272714 – 1272790 – 1272718

Direzion di pueste eletroniche: progettieducativi@comune.udine.it

Sît web: www.comune.udine.it

SERVIZI DI FACILITAZION DIGJITÂL

Il Comun di Udin al à ativât il Servizi di Facilitazion Digjitâl che al furniss assistence sore nuie su servizis e tecnologiis digjitâls.

Tra i servizi di supuart ufierts:

- ativâ la Cjarte di Identitât Eletroniche CIE par acedi ai portâi de Aministrazion Pubbliche
- recuperâ i codiçs pin e puk de CIE, modificâ i dâts di contat, recuperâ i dâts di acès dal SPID

Par vê plui informazions si rimande al sît dal Comun di Udin
<https://www.comune.udine.it/Servizi/Servizio-di-Facilitazione-Digitale>